

I Archivos Storicos Da Parochis Dal Deanât Di Cormòns

Luca Olivo

Al cumun di Cormòns al è un dai pi granc' e impuartans da provincia di Guriza. Ai pîs dal Mont Quarin e in plena zona dal Collio la zitât pol vantà una posiziòn geografica che podaresin definì "turistica" pa bieleza da campagna, pa salida al Mont Quarin, pai paisùs, daur da zitât, che son lis sos fraziòns e pal parc atrezât di Plesiva. No l'è di dismenteà ancia il confin di stât che pol essi un ocasiòn par riscuviarzi la storia e par visità il Collio sloven. Al *centro storico* ancia se relativamenti pizul al propòn al forest antics palaz di siòrs; il palaz Locatelli sede dal munizipi, su la plaza XXIV di Mai; la Villa Tomadoni, là che tal 1866 fò firmât l'*armistizio* dit di Cormòns, che veva fat finì la tiarza guera di indipendenza; il teatri comunâl.

Tra i fabricâs di architettura religiosa podìn segnalà prima di dut il monumentâl domo di Sant'Adalberto che fâs biela mostra di sé in somp di una s'cialinada e che cul so tôr "*domina*" la plaza XXIV di Mai; la Ciasa da Plêf Antighe, vecia sede dai plevâns di Cormòns; la glesia di Sant Leopolt, dut un cul vecio convent dai francescâns; lis ruinis da antiga, un grum, glesia di San Zuan; la glesia di Rosa Mistica e la glesiuta da Beata Vergine del Soccorso, a mieza via da salida sul Mont Quarin, cul so tôr mitût, par cui che 'l ciala vignint a Cormòns di sud, esata-

menti in linea cun chel dal Domo.

E propri l'elenco da glesîs da zitât nus parta a ciacarà dal argument dal articul. Come la zitât ancia la so glesia pol vantà una storia vecia di secui e di una siarta impuantanza. In fas di se che somea za dal 450 d.C. a fò la presenza di una *stazione curata* mituda lunc fûr da strada romana che pasava tai paragios. Non si sa però quant che a nas la plêf, forsi poc prima o propri quant che i patriarcias di Aquilea vevin fisât temporaneamente (628-737) la lor sede propri a Cormòns. La prima intitolaziòn da plêf fò che a Maria Vergine ma quant che Cormòns fo ciapada dentri stabilmenti ta Contea di Guriza si dezidè di gambià l'intitolaziòn cun che gnova a Sant'Adalberto, martirizât tal X secul. Il parsè si spiega prima di dut cul fat che sia i imperadôrs che i cons di Guriza erin particolarmneti devòs a che sant, tant che plui di qualchi cont partà il so non. Secondariamente il cambio di intitolaziòn l'è stat dovût ancia al fat che tal seconda mieza dal Doisent la vecia glesia di Santa Maria fò ristrutturada e di gnôf consacrada, chista volta in onôr, apunt, di Sant'Adalberto. Comunque l'impuantanza religiosa da glesia di Cormòns cresè tal timp tant che tra la fin dal Doisent e la fin dal Quatrisent rivà a slargià la so influenza su lis vilis, e relativis glesîs, di Capriva, Morâr, Corona, Mariàn e Borgnàn e su lis plêfs di Viarsa, Mossa e Luzinis. A Cormòns al risiedeva il plevàn mentri in chisti vilis erin mandâs a celebrà ciapelâns che no erin residents e vevin di rispuindi al plevan. Doma la glesia di Santa Maria Assunta di Migea podeva vantà un predi stabilmenti resident. In plui, a la fin dal Quatrisent, la glesia di Migea era rivada a ciapasi come *filiali* li glesis di Mariàn e Corona. E propri chist fat partà a planc a planc a distacà ancia ches atris glesis da plêf di Cormòns e a falis trasformà in ents autonomos ancia se continuavin a fasi riconiossi come *filiali*. Il che, ancia se faseva nasi no pocis controversis propi cun la glesia di Migea, partarà a la formaziòn dal deanât di Cormòns viars il Votsent.

Contemporaneamente la plêf di San Adalberto veva di confrontasi ancia cun il cumun e i siôrs di Cormòns e cun lis au-

toritâs dai stâs che vevin giurisdizion sul stes comun: fint al 1500 la Contea di Guriza e podopo la *Casa d'Austria*. Intant bisugna notà che la nomina dal plevan era riservada al patriarcia di Aquilea almancul fint al inizi dal XV secul quant che il fat fò contestât dai cons di Guriza; si rivà cussì al 1481 quant che al papa Sisto IV cun t'una *bolla* dezidè che al plevàn fos nomenât dal vicari patriarciâl sielzint di un grup di candiâs presentâs dai cons di Guriza. Il vicari dal plevàn inveza l'era elèt diretamenti dal comun e dopo confermât dal plevan o dal ordinari (vicari patriarciâl, Patriarcia, arcivescul). Il comun sielzeva ancia un ciapelan ch'el udava il vicari tal so ministeri. In plui chei di Cormòns podevìn doventà ancia camerârs da glesia, podint gestì diretamenti il so, a vonda grant, patrimoni. La presenza dal vicari e dal ciapielàn si spiega cul fat che il plevan titolâr l'era raramente residènt a Cormòns in mut continuatîf: il titul di plevàn l'era ambît di vari fameis sioris da Contea di Guriza (Coronini, de' Terzi, Del Mestri) sia pal impuartanza da glesia di San Adalberto sia sora-dut pa lis renditis, un grum consistentis, dal benefizi colegât. Se Cormòns a era una *sede* ambida cun bunis prospetivis di rendita a era però comunque una *sede periferica* lontàn dai puests dulà che vignivin ciapadis lis decisiòns impuartantis (Guriza stessa, Graz, Viena). La question da residenza fò resolvuda apena tal 1734 quant che doventò plevàn al baròn Francesco Saverio de' Terzi. Di ca podìn dì che taca la storia "moderna" da plê f di Cormòns. Risolta la questìon da presenza fisa dal plevàn chist podè slargià a font la so autoritât spiritual a lis glesis filiali cun cui che planc a planc larà a formasi il deanât di Cormòns. Tal 1753 quant che al papa Benedet XIV dezidè di dividi il Patriarciât di Aquilea ta dos arcidiocesi di Udin e Guriza la plêf di Cormòns pasà a chista ultima cul dirit dai arcivescui di nomenà il plevàn ancia se fint al 1828 il comun veva conservât il dirit di elezi il vicari. Duncia tal Votsent, rientrât il drastic ridimensionament da prerogativis da glesia tai ains di Napoleon, la plêf di Cormòns doventà no sol il centro dal so deanât ma ancia si viodè riconiossi, secont li les dal *impero d'Austria*, simpri pì largis

compentenzis in materia civîl tant che il plevàn doventà *ufficiale di stato civile* a duc i efies pa lis nasinzis, i matrimonis, lis muarts e ancia lis vaccinazions. Cun chist duncia doventava realtà una strentissima colaboraziòn cul stât. Dal pont di vista eclesiastic invece la nomena dai plevàns restava saldamenti tas mans dai arcivescui di Guriza e in plui ogni plevàn doventava automaticamenti deàn cul compit di coordinà e dirizi la vita spirituâl da glesis *filiali* e di fa di tramite tra l'ordenari e ogni singul predi. Lis robis no gambiarin ancia durant i teribî ains da prima guera mondiâl vivûs cun la linea dal front a pôs chilometri da zitât. Quant che Cormòns e dut il Gurizan pasarin al Regno d'Italia la plêf piardè lis compentenzis di stato civile e podè dedicâsi esclusivamente a la vita religiosa e spirituâl che cuntinua fint al dì di uè. La novità fo che dal 1939 la plêf otignì la denominaziòn uficiâl di "*arcipretale e decanale*". Di dì ancia che pa plêf, durant il Nufsent, pasarin, cun varis incarics, cualchi predis che forin importants pa storia da arcidiocesi come prè Jusef Peteani, prè Franzil Ballaben, mons. Agnul Magrini e, come zovin ciapelàn, don Pieri Cocolin, dal 1967 al 1982 arcivescul di Guriza.

Una storia cusì lungia e penza di avveniments non pol no ve vût influenza sul archivi da plêf di San Adalberto. E in efies l'archivi storic della parrocchia di Sant'Adalberto di Cormòns si presenta indubiammenti come un dei più prezîos e antics dal arcidiocesi di Guriza. Al è conservât in t'un unic locâl (nomenât "Biblioteca Antica") dentri dal vecio ricreatori di proprietât parrochiâl visavì da canonica. I lavôrs di ordenament e inventariaziòn forin orûs e progetâs tal 2003 dal plevàn di in che volta, bons. Paolo Bonetti, e partâs in devant fint al 2006 di Lucia Pillon e Luca Olivo. Ta "Biblioteca Antica", dongia da ciartis di archivio, che van dal 1570 al 1995, cun precedens al 1326, esistin ancia libris dai secui XIX e XX cun ancia tocs dai secui XVII e XVIII.

I lavôrs an riguardât duta la coleziòn documentaria a tacà propri dal 1570 slungiant fint al 2006. Son stâs cussì esaminâs e descrîs 22 metros linears di ciartis.

Prima di dut vegnin i *libri canonici* cioè i registros dai battiâs, dai matrimonis e dai muars secont se che veva stabilî t al *Concilio di Trento*. Chista sezion si dimostra particolarmanenti penza cun 73 tocs che van cun t'una impresionanta continuitât dal 1570 al 2006. Lis cifris ciacarìn besolis e non si pol là tant lontàn dal vêr se si dîs che la coleziòn dai *libri canonici* a è la pì gruesa, antiga e completa di duta l'arcidicesi; complessivamenti si pol dì ancia ca è una da pì ben tignudis esint che i registros danegiâs son veramenti pôs.

Subita dopo i *libri canonici* vegnin chês che son di subita someadis a cui che 'nda seguît i lavôrs lis raculeltis pì significativis pa ricostruzion da storia da plêf e dal sô teritori, cioè il font apartignut a pre Carlo de Colombicchio e la coleziòn dai "Atti ufficiosi". Pre Carlo de Colombicchio, di famea siora cormonesa, fo plevàn dal 1810 almancul fint al 1822, quindi in ains particolarmenti difizî dal epoca napoleonica a la restauraziòn. Al Colombicchio veva produsût una vora di documents sia pa sôs esigenzis di ufizi eclesiastic e civil sia come so interes storic. A di di uè podìn quindi disponi di un grant numer di ciartis che podin iudanos a seguì quasi di par di i fas di un'epoca storica indubiamenti nevralgica. Cronologicamenti dopo da ciartis dal Colombicchio vegnin i "Atti Ufficiosi". Sin di front a la corrispondenza praticamenti completa, dividuda in 35 fascicui an par an, gestida dai plevàns di Cormòns dal 1822 al 1970. Denti di chis'c fascicui podìn ricostruì i rapuars tra la plêf e l'ordinariât arcivescovil ma ancia cun atris ens di glesia come atris parochis dal deanât, glesis fur da diocesi, singui fedei. I "Atti Ufficiosi" nus udin ancia a ricostruì chei che son stâs i rapuarts, simpri tignus in granda consideraziòn e a voltis ancia difizî cun lis autoritâs civilis e militaris austriachis prima e talianis dopo. In fin la coleziòn in questìon pol dà un resocònt dai avenimens pì impuartans di Cormòns e dal ategiamet tignût in liment da so glesia.

Una plêf siora come che di San Adalberto veva acumulât tai secui un grant patrimoni di imobî rivas dongia cun donaziôs, compravenditis, permutis. Eco allora che par gestì un grant pa-

trimoni si à acumulât una granda quantitât di documentaziòn di un interès storic indubitabil. Tachìn cun la cameraria, l'ent che al aministrava il patrimoni da plêf, ver e propri pont di incuintri tra il plevan e i laicos che di volta in volta doventavin camerârs. I documens di cameraria si componin di ben 50 pergamenis, pì o mancù ben conservadis, e un registro che van complessivamente dal 1326 al 1745. Storicamenti dopo da cameraria a ven la fabbrica, là che il plevàn l'è afiancât tai compis di aministrazion di doi o plui fabricîrs. Lis ciartis relativis, ben 62 tocs tra fascicui e registros, van dal 1683 al 1961. Simpri in liment da aministrazion dal patrimoni son stâs individuâs e descrîs 44 tocs (fascicui, registros e quadernos) che van dal 1700 al 1980 e che riguardin ancia i posedimens dai *benefici ecclesiastici* da glesia di Sant Leopold e da Beata Vergine del Soccorso.

Completin la coleziòn da ciartis da plêf ches che riguardin di dongia la vita spirituâl, il deanât, lis ativitâts di formaziòn e di educaziòn ma ancia che ricreativis. Come tims si ciacara dal 1929 circa al 1970 circa.

Concettualmente fur dal archivio da plêf ma conservada simpri ta "Biblioteca Antica" podìn ciatà la coleziòn dai "Documenti Storici Cormonesi": una sinquantina su par jù di singui documens o pizui fascicui radunâs tra XIX e XX secul di don Zuan Blasutic, titolâr dal *beneficio* da Beata Vergine del Soccorso e ciapelàn a Cormons. I documents riguardin la storia da glesia e da zitât di Cormons e van dal 1500 al 1911.

Vidût par fuorza in struc il grant archivio storico da plêf di San Adalberto podìn dà una ociada ancia a se che resta dal deanât e a lis glesias cui archivios plui interesans, ancia se pizui.

Subita dongia di Cormons ciatìn, e vin za vut in liment parsora, la parochia di Santa Maria Assunta di Migea, di antiga fondaziòn. Il so archivi, ordenât e inventariât quasi dis ains fa di Vanni Feresin e Giada Piani, pol vantà una coleziòn di 24 *libri canonici* che van dal 1626 a dì di uè. Un fat particolarmenti significatîf par una pizula comunitât come che di Migea in cui però la presinza da glesia à vut di simpri una part fondamentâl.

Dongia di chis'c registros e di prima impuartanza pa ricostru-
ziòn da storia da glesia e dal pais son il catapàn, un dai rârs
esempis ta diocesi, restaurât dal 1602 di un esemplâr dal XV se-
cul, e ben doi notevui *urbari* (che coventavin a la aministrazion
dai bens da glesia) che van dal 1547 al 1818. La rasegna da ciar-
tis vecis continua cun ben 4 pergamenis (cun parsora as di varia
natura) dal 1532 al 1533 e una dal 1649, purtrop mal mitudis.
Râr e prezios come al catapàn l'è ancia un registro apartignût a
la fraterna di Sant'Antoni, che veva sede ta famosa glesiuta dal
sant su la mont, che documenta iscris e avveniments dal 1553 al
1580. Ma non podin fermasi sinza ricuardà i 12 fascicui di *car-
teggio* da glesia che van dal ultin Sietsent al prin Nufsent che
son utî par ricostruì lis vicendis pì impuartantis da vita da paro-
chia e lis sos relaziòns.

Entri il deanât un atra glesia storicamenti impuartanta a è
che dal Santissimo Nome di Maria di Capriva dal Friûl, dal 1664
un dai vicariâs di Cormons e dal 1767 trasformada in parochia
autonoma. Ma la glesia a esisteva ancia prima dal vicariât tant
che i soi 26 *libri canonici* tachin dal 1619 e rivin, ancia se cun
qualchi busa temporâl, fint al dì di uè. Dongia dai *libri canonici*
si podin cità ancia ben 3 *urbari* che an coventât a la aministra-
zion dal patrimoni da glesia tra il 1574 e il 1901. Il lavôr di orde-
nament e inventariazion dal archivio storic l'è tacât di mancul di
un mes a cura di cui che al scrîf ma fin di cumò si pol dì che al
archivio "al promet ben" tal sens che za un prima ociada, super-
ficiâl, si à podût notà come i documens pì antics, secui XVI –
XVIII, coventâs pa aministrazion dal patrimoni, sedin in quantitât
a vonda granda e riguardin aspies di notevul interès dal pont di
vista da storia dal dirèt e dal teritori. Di segnalà ancia il fat che
tal archivio storic son conservadis ancia ciartis da vecia Cassa
Rurâl (fondada tal 1896) di Capriva: documentazion, chista, che
si presenta particolarmenti utila, magari mituda a sistema cun
atris companis ciartis di atri glesî s, par studià il fenomeno dal
nassi e svilupasi da cassis ruralis tal Gurizan di fin Votsent e inizi
Nufsent.

Chista rasegna sui archivios storicos dal deanât di Cormòns finis cun la menziòn di atris dos glesis che podin vantà tai lor archivios ciartis particolarment antighis.

La parochia di San Giorgio Martire di Brazzàn pol vantà 27 *libri canonici* che van dal 1635 al dì di uè cun buna continuitât e 3 registros di contabilitât (1722 – 1797) di ben 3 fraternis dife-rentis che an operât contemporaneamente entro la glesia: fraterna da Madona, fraterna dal Santissin Sacrament e fraterna di San Roc, dut chist a *testimonianza* di trop viva che era la spiritualitât dai fedei dal luc.

La parochia di Santa Maria e San Zenone di Corona di Mariàn a 'nda 15 *libri canonici* dal 1642 al dì di uè. Ma se che colpìs di plui son i 25 quadernos dai camerâs che van dal 1555 al 1747 e lis 4 cartelis di documentaziòn storica dal XVI al XIX secul.

Duncia il deanât di Cormòns al si segnala par essi proprietari di un notevul patrimoni archivistic ben descrit tra i lavôrs su Cormòns, Migea e Capriva e lis operiazions di censiment di cheis atris glesis partadis in devant tal 2004.

Sintesi - *L'articolo si propone di fornire un quadro sintetico degli archivi storici di alcune delle parrocchie del decanato di Cormòns. Queste si segnalano, entro l'arcidiocesi di Gorizia, per possedere un patrimonio storico particolarmente significativo sia sul piano quantitativo che su quello qualitativo che consentono alla ricerca di ricostruire accadimenti storici risalendo indietro nel tempo almeno fino al XV secolo. La "parte del leone" naturalmente spetta all'antichissima Pieve Arcipretale e Decanale di Sant'Adalberto di Cormòns che vanta un archivio storico particolarmente ricco definibile come "buon secondo" dietro al patrimonio documentario custodito presso l'Archivio Storico della Curia Arcivescovile. La Pieve custodisce con impressionante continuità documenti a partire dal XV secolo che si fanno via via più fitti con il trascorrere dei secoli fino al XX. Il materiale è stato ordinato ed inventariato tra il 2003 ed il 2006 e gli inventari risultanti si segnalano per descrivere una raccolta particolarmente variegata ed articolata che risente profondamente delle vicende storiche che hanno interessato la Pieve. Di particolare interesse si rivela essere anche l'archivio storico della parrocchia di Santa Maria Assunta di Medea, riordinato ed inventariato una decina di anni orsono, che può vantare una cospicua raccolta di pergamene, un catapàn risalente al XV secolo ed aggiornato fino al XX, e i libri canonici che vanno dalla fine del XVI secolo ai giorni nostri. Da non trascurare anche l'archivio storico della parrocchia del Santissimo Nome di Maria di Capriva del Friuli, i cui lavori di riordinamento ed inventariazione sono tuttora in corso, che vanta libri canonici dai primi anni del Seicento ed un notevole nucleo di documentazione dal XVII al XIX secolo.*